



Muhamed (Asim) Ramović rođen je 1960. godine u Zabusu – Ilovača kod Goražda gdje je završio Osnovnu školu. Gazi Husrev - begovu medresu završava u Sarajevu, a zatim Filozofski fakultet, Odsjek Orientalistika gdje stiče zvanje profesora arapskog i turskog jezika te arapske i turske književnosti.

Na Fakultetu Političkih nauka Univerziteta u Sarajevu, Odsjek politologija, okončao je sve ispite na Post diplomskom studiju te uspješno odbranio magistarski rad na temu „REFORMA JAVNE UPRAVE U OPĆINAMA BOSANSKO - PODRINJSKOG KANTONA U PROCESU INTEGRACIJE ULASKA BiH U EVROPSKU UNIJU - STUDIJA SLUČAJA“. Nakon više od četiri godine naučno -istraživačkog rada i aktivnog

sudjelovanja u reformskim procesima kada je u pitanju javna uprava u Bosni i Hercegovini, te procesima euroatlanskih integracija, uspješno brani doktorsku disertaciju „EUROPSKE INTEGRACIJE KROZ PRIZMU REFORME JAVNE UPRAVE U JEDINICAMA LOKALNE SAMOUPRAVE“ čime stiče akademsku titulu doktora nauka.

Radio je u Islamskoj zajednici 16 godina. U dva mandata obnašao funkciju direktora Osnovne škole „Hasan Turčalo Brzi“ , a zatim u jednom periodu funkciju direktora Mješovite srednje škole „Enver Pozderović“ Goražde. Arapski jezik predavao u Srednjoj stručnoj školi „Džemal Bijedić“ u Goraždu.

Nakon rada u prosvjeti, posvećuje se radu u privredi i obnaša menadžersku funkciju kao direktor Društva „Šeh – in“ d.o.o. Goražde do općinskih izbora 2008. kada je izabran za načelnika Općine Goražde. Bio je učesnik raznih seminara, predavanja, konferencija i kongresa u Bosni i Hercegovini, Hrvatskoj, Njemačkoj, Francuskoj, Švedskoj, Češkoj, Španiji, Egiptu, Turskoj, Crnoj Gori i Makedoniji. Izvjesno vrijeme boravio u Kairu, Egiptu, u cilju usavršavanja arapskog jezika.

Bio je aktivno uključen u osnivanje Kulturno prosvjetnog društva „PREPOROD“ i bio član Izvršnog odbora ovog Društva.

Duži niz godina aktivni je učesnik reforme osnovnog i srednjeg obrazovanja, kroz više projekata, a posebno: Centar za obrazovne inicijative „Step by step“ i „Škole prijatelji djece“ gdje je bio i koordinator osam godina, Naša djeca, World Vision, Civitas, UNICEF, UNESCO, Save the children i dr. Održao je veliki broj predavanja iz oblasti odgoja i obrazovanja. Na Ekonomskom fakultetu Univeziteta u Sarajevu aktivno učestvovao na seminaru „Menadžment ljudskih resursa“ (HRM).

Bio je pokretač i predsjednik savjeta školskih listova „Biser“ pri Osnovnoj školi i GAP „Korak naprijed“ pri srednjoj školi, a bio je i član Savjeta goraždanskog lista „Glas Goražda“. Obavljao funkciju direktora „Festivala prijateljstva Goražde 2006“, a od stupanja na funkciju načelnika Općine 2008. godine, predsjednik je Organizacionog odbora te međunarodno priznate manifestacije.

Tokom svoje karijere, bavio se političkim aktivnostima, od predsjednika Mjesne zajednice, do poslanika u Skupštini Bosansko - podrinjskog kantona Goražde. Bio je predsjednik Upravnog odbora GP „Drina“ Goražde, član UO firme „Centroprevoz“ Goražde, zatim član UO u institucijama: Centar za kulturu Goražde, RTV BPK Goražde, Planinarskog društva „Maglič“ Goražde, Izviđačkog društva BPK i Šahovskog kluba BPK Goražde, a bio je i član UO Auto-moto kluba BIHAMK Goražde. Trenutno je aktivni član Predsjedništva Saveza općina i gradova Federacije Bosne i Hercegovine.

Dobitnik je značajnih priznanja i zahvalnica kako iz naše zemlje tako i iz inozemstva a od čega se posebno izdvaja titula "Naj-načelnik F BiH 2011" koju mu je dodjelio Evropski pokretu BiH na centralnoj svečanosti povodom dana Evrope održanoj na Jahorini 05.05.2011., te Zlatnu značku BIHAMK-a za veliki doprinos u radu samog BIHAMK-a. Učesnik je i pokretač mnogih humanitarnih akcija na širem području Bosne i Hercegovine.

Nakon što je proglašen najeuropskim načelnikom za 2011. godinu i u 2014. godini dobitnik je priznanja Evropskog pokreta u BiH - "NAJBOLJI MENADŽER – NAČELNIK U FBIH 2014."

Na izborima održanim u oktobru 2012. godine, reizabran je na funkciju načelnika Općine, čime je postao prva osoba poslije rata kojoj je to pošlo za rukom. Danas pomaže i učestvuje u naučnim, kulturnim i sportskim aktivnostima i veoma je aktivan učesnik svih reformskih razgovora, pogotovo kada je u pitanju reforma javne uprave.